

ORDIZIAKO UDAL PLANEAMENDUKO AHOLKU BATZORDEAREN ERREGELAMENDUA

ARRAZOIEN AZALPENA

Toki Araubidearen Oinarriak arautzen dituen apirilaren 2ko 7/85 Legearen 20. artikuluan xedatutakoaren indarrez, eta Lurzoruari eta Hirigintzari buruzko ekainaren 30eko 2/2006 Legean xedatutakoaren arabera, eratu da Udal Plangintzako Aholku Batzordea Ordiziako Udalean, herritarrek udal-plangintzaren arloan parte hartzeko kontsulta-organo gisa.

Hirigintzaren arloan, eta Lurzoruari eta Hirigintzari buruzko ekainaren 30eko 2/2006 Legearen 109. artikulua ezartzen duenaren arabera, hiri-plangintza behin betiko onartzeko eskumena duten udalerrri guztiek nahitaez eratu behar dute Udal Plangintzako Aholku Batzorde bat, herritarrek parte hartu ahal izateko mekanismoak sustatzearren. Hirigintza-planen dokumentazioari erantsiko zaizkion programak formulatuta, esate baterako, gauzatu ahal izango da herritarren parte-hartze hori. Batzorde horrek goraxeago aditzera emandako helburuak ez ezik, toki-entitatearen hirigintza-antolamendurako tresna nagusiak –eta batez ere Plan Orokorraren inguruko zehaztapenak- formulatzen eta onartzen laguntzea du helburu. Azkenik, Lege horren 110. artikulua adierazten duenez, onartu beharreko Batzorde horren Erregelamenduan finkatu behar dira Batzordearen eraketa eta haren oinarrizko ezaugarriak.

Hori dela eta, Erregelamendu horrek udalerriko Udal Plangintzako Aholku Batzordearen eraketa eta funtzio-namendua arautzea du helburu, betiere gizarteak hiri-plangintza estrategikoan eta udalerrian garapen iraunkorra bideratzeko eta sustatzeko ahaleginean parte hartu ahal izateko aukera emango duen aholku-organo kontsultibo gisa. Erregelamendu horren bidez, Udal Plangintzako Aholku Batzordearen oinarrizko egitura, funtzioak eta araubide juridikoa, besteak beste, finkatzen dira, betiere Herri Administrazioen Araubide Juridikoaren eta Administrazio Prozedura Erkidearen azaroaren 26ko 30/1992 Legearen 22. artikuluan aurreikusten den taldeko organo den aldetik.

Guzti horren ondorioz, Lurzoruari eta Hirigintzari buruzko ekainaren 30eko 2/2006 Legearen 110. artikuluan xedatutakoari jarraituz, egin da honako erregelamendua.

I. KAPITULUA

UDAL PLANEAMENDUKO AHOLKU BATZORDEAREN IZAERA ETA FUNTZIOAK

1. artikulua. Udal Planeamenduko Aholku Batzordea sortzea.

1. Euskal Autonomia Erkidegoko Lurzoruari eta Hirigintzari buruzko 2/2006 Legearen 110. artikuluaekin bat etorritik, Araudi honen bidez Ordiziako Udal Planeamenduko Aholku Batzordea sortu da.



2. Ordiziako Udal Planeamenduko Aholku Batzordea, hain zuzen, aholkurako eta eztabaidarako organo lokal bat da, hirigintza-planak egin, izapidetu eta onartzeko prozedurari dagokionez kontzertazio sozialerako funtzioak beteko dituena.

2. artikulua. Izaera juridikoa.

Herri Administrazioen Araubide Juridikoaren eta Administrazio Prozedura erkidearen 30/1992 Legeak araututako kide anitzeko organo gisa sortu da.

3. artikulua. Funtzioak eta helburuak.

1. Udal Planeamenduko Aholku Batzordeak nahitaez eman beharko du plangintza estrukturala (Plan Orokorra, Sektorizazio Planak eta Bateratzeko Planak) formulatzeko, puntualki aldatzeko edo berrikuspena egiteko espedientei buruzko irizpena.

2. Aholku Batzordearen nahitaezko txostenak planeamenduko aurrerapen-dokumentua jendaurrean ikusgai jartzeko epean egingo dira, eta aurrerapen-dokumenturik izapidetuko ez balitz berriz, hastapenez onartutako dokumentua jendaurrean ikusgai jartzeko epean. Aipatu txostenak epe horren barruan egingo ez balira, txosten horiek onartzeko ardura duten udal organoek eskumena izango dute espedienteen izapideekin jarraitzeko.

3. Era berean, Aholku Batzordeak eskumena izango du hirigintza-antolamenduko beste plan eta tresna batzuei buruzko informazioa biltzeko eta horren berri emateko batzordea osatzen duten kideen gutxienez herenak horrela eskatuz gero.

4. Aintzat hartzen dituen gaiak aztertzeko agirien bidez esku hartuko du Batzordeak. Agirietan proposamenak edo aukerak aurkeztu ahal izango ditu, baina horiek ez dira izango lotesleak herri-administrazioentzat.

5. Batzordeak Udalean aurkeztutako proposamen edo aukerei dagokienean, planeamenduko dokumentuaren behin betiko onarpenaren ebazpenean horiei buruzko argibiderik ematen ez denean, erantzun arrazoitua eman beharko da.

6. Jendaurrean ikusgai jarri baino lehen, artikuluko honetako 1. atalean ageri den edozein espedienteren hasiera ofizioz jakinaraziko die Udalak Aholku Batzordeko kideei.

II. KAPITULUA

UDAL PLANEAMENDUKO AHOLKU BATZORDEAREN OSAERA

4. artikulua. Osaera.

Planeamenduko Aholku Batzordeak kide hauek izango ditu:

a) Lehendakaria: Alkatea izango da Aholku Batzordeko lehendakaria; alabaina, edozein zinegotziren esku utz dezake lehendakaritza.



b) Lehendakariordea: Hirigintzako edo ingurumeneko zinegotzi titularra izango da. Eta lehendakariak bezala, edozein zinegotziren esku utz dezake bere kargua. Aipatutako ordezkapena alde batera utzita, lehendakariordeak lehendakaria ordezkatu du, azken horren kargua hutsik dagoenean, ez dagoenean edo gaixo dagoenean.

c) Zinegotziak diren kideak:

c.1) Ingurumeneko zinegotzia (baldin eta lehendakariordea ez bada).

c.2) Udalean ordezkari bat duen alderdi politiko bakoitzeko ordezkari bat, alkatearena, lehendakariordearena eta ingurumeneko zinegotziarena kenduta.

d) Zinegotziak ez diren kideak, ordezkari honen arabera:

d.1) Ordiziako auzo-elkarte bakoitzeko kide bat, gehienez ere 2.

d.2) Talde ekologista edo ingurumen arloko talde ezberdinen ordezkari bat.

d.3) Batzordekide bat, Tokiko Agenda 21eko ordezkaria.

d.4) Hezkuntza komunitateko kide bat

d.5) Txikizkako merkatarien elkarteetako ordezkari bat.

d.6) Enpresa-elkarteetako ordezkari bat.

d.7) Nekazaritza-sindikatu etako ordezkari bat.

d.8) Gizarte Ongizateko Udal Aholku Batzordeko ordezkari bat.

d.9) Besteak beste, kirol-, kultura- eta gizarte-elkarteetako ordezkari ba.

e) Idazkaria: Aholku Batzordeko idazkari izango da udalbatzako idazkaria edo bera ordezkatzeko izendatutako pertsona. Idazkariak, Lehendakariaren ikuskaritzapean, laguntza eta aholkuak emango dizkio Aholku Batzordeari.

f) Lehendakariak, Lehendakariordeak edo edozein kidek hala proposatuz gero, Batzordeko bileretan parte hartu ahal izango dute, batzordeko kideak izan ez arren, hitzarekin baina botorik gabe:

f.1) Hirigintza-planak idazteaz arduratzen diren teknikariek.

f.2) Hirigintzako eta ingurumeneko udal teknikariek.

f.3) Hirigintza eta Ingurumenaren arloan edo, besteak beste, kultura, kirol, hezkuntza eta gizarte gaietan adituak diren pertsona ospetsuek.



5. artikulua. Batzordeko kideen izendapena eta kargu-uztea.

1. Aholku Batzordeko kideak Alkateak izendatuko ditu. Izendapenak horrela proposatuko dira:

- a) Alderdi politikoen ordezkariak, alderdiek beraiak proposatuta.
- b) Gainerako kideak, ordezkatzeko dituzten erakundeen ordezkariak-organoei proposatuta.

Batzordean ordezkariak izendatzeko, elkarteek inskribatuta egon beharko dute dagokien Elkarten Erregistro Orokorrean eta Irabazi Asmorik Gabeko Udal Intereseko Elkarten Erregistroan.

Batzordean parte hartu nahi duten entitateen kopuruak gehieneko ordezkariak kopurua gainditzen badu, eta elkarte horien artean adostasunik ez badago, Batzordeko lehendakariak ezarriko du parte hartzeko modua – zozketa bidez, txandakatze bidez, batera bertaratzearen bidez, edo egoki irizitako beste formula baten bidez–.

2. Kideek aldeztatik onartu beharko dute haien izendapena.

3. Aholku Batzordeko kideen agintaldiaren iraupena bat etorriko da izendatuak izan ziren agintaldiarekin. Dena den, ondoko arazoiengatik kargua utzi ahal izango dute:

- a) Kide izateari uko egiteagatik.
- b) Epai irmo baten bidez kargu publiko bat betetzeko ezintasuna edo ezgaitasuna aitortzen denean.
- c) Haien karguagatik Batzordeko kide diren pertsonak kargua uzten dutenean, Batzordea ere utzi beharko dute.
- d) Proposatutako erakundeak kargugabetu duelako edo hautatu zuen elkarteak utzi duelako.
- e) Araudi honetan adierazitako funtzioak behin eta berriz ez betetzeagatik.

4. Batzordeko plaza hutsak izendapenerako ezarri den modu berean beteko dira.

III. KAPITULUA

FUNTZIONAMENDU ERREGIMENA

6. artikulua. Ohiko eta ezohiko bilkurak.

1. Planeamenduko Aholku Batzordeak ohiko bilkurak egingo ditu Planeamendu espedientei buruzko irizpena emateko, Araudiaren 3. artikuluan ezarritakoaren arabera. Ohiko bilkuran, aipatutako txostena egin beharko du.



2. Dena den, ohiko bilkurez gain, Batzordeak ezohiko bilkurak egin ahal izango ditu presazko edo komenentziako arrazoiak direla medio. Horrelakoetan, bilkurarako deialdia Lehendakariak egingo du, Lehendakariak berak proposatuta edo Batzordea osatzen duten kideen gutxienez herenak eskatuta.

7. artikulua. Quoruma.

Batzarrek, deliberazioek eta erabakiek balioa izan dezaten, beharrezkoa izango da egotea Lehendaria eta Idazkaria edo horiek ordezkatzten dituzten personak eta, gutxienez, Kontseiluko kideen erdia.

Bestela, Batzordea bigarren deialdian eratuko da, ordu erdi beranduago, batzordekideen kopurua edozein izanda ere. Hala ere, Lehendakariak eta Idazkariak bertan egon beharko dute nahitaez.

8. artikulua. Bilkurak deitzea.

1. Batzordeak nahitaez txostena egin behar duen bilkuretarako deialdia Aurrerapen-dokumentua jendaurrean ikusgai jarri baino lehen egin behar da, eta Aurrerapen-dokumenturik ez badago, berriz, hastapenez onartutako dokumentua ikusgai jarri baino lehen; eta, betiere, bilkurako eguna baino gutxienez bost astegun lehenago. Nolanahi ere, Deialdiarekin batera joango da bilkurako gai-zerrenda. Gai-zerrendan ageri diren gai buruzko informazioa Batzordeko kideen esku egongo da epe horretan.

2. Batzordeko Lehendakariak, Lehendakariak berak proposatuta edo edozein Batzordekidek eskatuta, premiazkotzat joz gero, gai-zerrendan ez dagoen beste edozein gai sartzea proposatu ahal izango du bilkuraren aurretik, baldin eta Batzordearen eskumenen barruan baldin badago.

9. artikulua. Deliberazioak.

Batzordeko Lehendakariak batzarrak zuzendu, eztabaidak antolatu eta bilerak ondo egiten direla bermatzeko komenigarriak diren neurriak hartuko ditu.

10. artikulua. Lan-batzordeak.

1. Lan-batzordeak osatu ahal izango dira hirigintza-planeamenduko gai zehatzak jorratzeko edo Batzordearen gehiengoak beharrezkotzat jotzen duenean.

2. Lan-batzordeen osaera, izena eta funtzionamendua Batzordeak erabakiko du.

3. Lehendakariak beharrezkotzat eta egokitza jotzen duen laguntza teknikoa eskatuko du udalean bertan edo udaletik kanpo.

4. Lan-batzordeek jorratutako gaien berri emango diote Batzordeari.

11. artikulua. Erabakiak hartzea.

1. Aholku Batzordearen erabakiak bildutako kideen gehiengo soilaren bidez hartuko dira. Berdinketa egonez gero, Lehendakariak kalitate botoa emango du. Nolanahi ere, boto partikularrak har daitezke eta ados ez dauden alderdien iritziak agerrarazi.



2.Hartzen diren erabakiak akta batean jasoko ditu Idazkariak, eta akta hori aztertu beharreko hirigintza-espeditentari gehituko zaio. Erabaki horiez gain, Udalarentzat lotesleak izango ez diren hirigintza-antolamenduko proposamen edo aukera zehatzak aurkeztu ahal izango dira.

12. artikulua. Funtzionamenduko barne-arauak.

Aholku Batzordeak, Araudi honetan ezarritakoarekin bat etorritz, bere funtzionamenduko barne-arauak ezar ditzake.

13. artikulua. Tokia eta Aktak.

Aholku Batzordearen batzarrak Udalaren bulegoetan egingo dira. Batzar bakoitzean akta egingo du idazkariak; akta hori Batzordeko kideei bidaliko zaie hamabost astegunen barruan eta hurrengo batzarrean onartuko da egokia izanez gero.

LEHEN XEDAPEN GEHIGARRIA

1.Araudi hau Gipuzkoako Aldizkari Ofizialean argitaratu eta hogeitaz asteguneko epean, seigarren artikuluan adierazitako elkarteek eta pertsonak, nahi izanez gero, Udal Planeamenduko Aholku Batzordean parte hartzea eska dezakete. Alkateak eskaera horiei erantzun eta onartutako pertsonak deituko ditu Batzordea eratzeko egingo den bilerara.

2.Udal Planeamenduko Aholku Batzordea formalki eratuta geratuko da horretarako deituko den bileraren bidez.

3.Batzordea osatu ondoren, bertan parte hartu ahal izango dute Araudi honetan xedatutakoa betetzen duten elkarteek, baldin eta ez bada gairiditu zinegotziak ez diren gehienezko kideen kopurua.

BIGARREN XEDAPEN GEHIGARRIA

Araudi honetan espresuki aurreikusi ez denari dagokionez, Udal Planeamenduko Aholku Batzordearen funtzionamendua eta jarduna Administrazio Publikoen Araubide Juridikoari eta Administrazio Prozedura Erkideari buruzko azaroaren 26ko 30/1992 Legearen II. kapituluko II. tituluaren xedatutakoaren arabera izango dira. Gainerako xedapenetan, Toki Araubidearen Oinarriak arautzen dituen apirilaren 2ko 7/1985 Legean eta Tokiko Erakundearen Antolaketa, Funtzionamendu eta Araubide Juridikoaren Araudian (2568/1986 Errege Dekretua) ezarritakoa bete beharko da.

HIRUGARREN XEDAPEN GEHIGARRIA

Araudi honetan ezarritakoa aplikatu eta garatzeko beharrezkoak diren xedapenak eta arauak ezartzeko eskumena ematen zaio Tokiko Gobernu Batzordeari.

AZKEN XEDAPENA

Araudi hau indarrean egongo da hamabost asteguneko epean Gipuzkoako Aldizkari Ofizialean argitaratu eta biharamunetik kontatzen hasita.



¡Error! Nombre desconocido de propiedad de documento.

ONARPENA: 2009ko otsailaren 5
Aldaketak: 2009ko martxoaren 26
G.A.O.: 112 zk. (2009/06/18)



ORDIZIAKO UDALA

¡Error! Nombre desconocido de propiedad de documento.

